

H A R A N G V E

AV ROY, A LA ROI-
NE, ET AVX HOMMES FRAN-
çois, sur l'entretènement & re-
conciliation de la Paix, & en-
tree dudit Seignr en ses villes.

Par Gabriel Bounyn aduocat en la cour
de Parlement à Paris, & Lieutenãt
de Chasteauroux en Berry.

A

Madame de Sauoye, Duchesse
de Berry.

- Regemque dedit qui fœdere certo
Et premere & laxas sciret dare iussus habenas.



A P A R I S,

Par Robert Estiène Imprimeur du Roy.

M. D. L X V.


Avec priuilege dudit Seigneur.

A MADAME DE SA-
VOYE DVCHESSE
de Berry.

A autre fin ie n'ay (trop hardi) trauersé
L'Helicon & Parnasse, & de l'eau Pegasine
Ne me suis abbreuüé: au creux de ma poitrine
A autre fin ie n'ay tant de fruiçts amassé:
Ingaignable pourquoy me froy-ie tant lassé
A recueillir les fruiçts de la pure doctrine:
A rechercher le Ciel, les herbes, la marine,
Et à cognoistre au vray l'histoire du passé?
Sinon pour engrauer dans vn Cedre durable
Les prisables vertus dont ce Dieu tant aimable
T'a comblee? & vanter par mes meilleurs escrits
Ta sainte pieté, ta candeur, & humbleesse,
Ta debonnaireté, ta grandeur & hauteesse,
Dont Dieu condignement t'en adinge le pris?



HARANGVE AV ROY,
A LA ROINE, ET AVX HOM-
mes François, sur l'entretènement &
reconciliation de la paix, & entree
dudict Seigneur en ses villes.



IRE, les fleurons
de Liz qui courō-
nent vostre Ma-
iesté, ce sont les
insignes & ioyaux
de paix que vous
gaignez en pur gaing & aduan-
tage sur les Rois & Princes estrā-
gers: lesquels poussez de leurs pas-
sions desmesurees, ont cuidé estre
le plus seur moyen d'aggrādir les
pays confins & limitrophes de
A.ij.

*Plutar. en la
vie de Ly-
curg.*

*Iust. au proef.
des Instit. Et
Cic. au 2. des
loix.*

*Cic. au 3. des
Offic. et Suet.
en Cesar.*

*Athen. liur.
5. chap. 6.*

*Plutar. en
erich.*

leurs Empires, par fers & armes
attrempees & forgees par l'ou-
urier mortel, Que non (à l'exem-
ple de Theopompe ||) les accroi-
stre par loix & statuts, les seuls fô-
demens & defenses durables des
Royaumes||. Je ne me puis tant
commander, Sire, que ie ne con-
damne l'ambition trop gloute de
ce Cesar, qui pour aspirer à l'Em-
pire ne doutoit de violer & en-
fraindre les loix Romaines||, fai-
sant vertu de les transgresser pour
vn si sainct vœu. Certes tel des-
seing & si lourd aduis sônoit mal
en vn Romain & de telle mar-
que, pour meritoiremēt desservir
la couronne de Myrte||. Et si c'e-
stoit se mal accoustrer de l'opiniô
& conseil que Pyrrhe Roy des E-
pirotes donnoit à ses enfans, ou
Philippe Macedon || à Alexandre:

qui estoit de briguer les Empires
plustost par vertu, q̃ par faueurs,
ambitions, ou mencees. A bon
droict, Sire, i'ay voulu parler des
loix & statuts, comme estans la
principale colonne & pillier de
vostre Royaume, & sans l'estroict
lien desquelles loix l'estat de vo-
stredict Royaume se subuertiroit:

voire (comme dit Demosthene) ||
auecque telle brutalité & impu-
nité de vices, que nous ne differe-
rions en riens de vie à celle des
bruts. Le seul mespris & mese-
stime des loix (Sire) ne charroye
& apporte auecque soy que diui-
sions & guerres intestines aux
Royaumes, subuersions & desar-
rois des choses publiques: || Et au
cōtraire, où la loy cōmāde, defēd,
permet, & punit ||, là toutes choses
sont retenues en leur entier, au

*Demost. en
l'orais. contre
Aristog.*

*Xenoph. liur.
8. de la ped.
de Cyrus.*

*La loy Legis
D. des loix.*

H A R A N G V E

grand repos & vnió des mortels,
 paix & tranquillité des Republi-
 ques. Je ne trouue & ne scay
 vrayemēt, Sire, Republique (voire
 fusse celle des Locrois) où la loy
 ait plus commadé, & qui ait plus
 flori en grandeur, paix & vnion,
 que celle des Spartes, tant immor-
 talisee par les liures: comme bien
 à propos nous lifons d'Archida-
 me, qui enquis qui estoyent les
 Princes & potentats de Sparte, re-
 spondit que c'estoyēt les loix. Ce-
 ste Republique, Sire, où les loix
 sont sallemēt honnies & foullees
 aux pieds, ne peult qu'elle ne rui-
 ne, pour honteusement tomber
 en proye & sous l'obeissance &
 seruitude de ses aduersaires. Car
 où les loix sont deflories, crainte
 n'y est plus, dont s'en ensuit ino-
 beissance: & où mespris & inobeis-

*Cic. contre
 Vati. & au
 2 des loix.*

Ælian liu. 2.

*Plutar. és A-
 poptheg.*

*soph. en Phe-
 dre,*

sance regnēt, là toutes choses impunement sont loïsibles. Là c'est acte & œuvre meritoire (comme dit Platon) de chasser aux honneurs, de briguer, seditionner, & iniustement de tollir l'autrui.

*Soph. en Aia-
ce.*

*Plat. au 3.
Dial. de la
Rep.*

Sire, depuis que ces prouocables *le mien, le tien, & le sien*, ont esté vsageremēt receus entre les mortels cōtre la loy de Dracon

*ἡ δὲ ἀλ-
λοτριῶν ἀφίσσασθαι, Alex. d'Ale-
xand. liur. 6.
chap. 10.*

λoτρίoν ἀφίσσασθαι, l'estat des Republiques a esté confusement subverti, & les peuples d'icelles diuisez.

Car (comme dit Hermogenian) ces pronōs *le mien & le tien*,

*L. 5. De Iust.
D. & P. I. de
la Diuif. des
choses aux
Iust.*

ont esté les premieres semēces & racines des guerres ciuiles.

Ce Platon, comme tousiours diuin,

pour accourir à routes embusches de seditions, a ordonné en sa Republique societé & vnion de toutes choses, voire & des enfans:

*Plat. au Dial.
5. de la Rep.*

H A R A N G V E

estimant (& sainemēt certes) partialité estre la seule flammeſche & fusil des seditions & esmeutes. Auons-nous (dit-il) peste ou contagion plus pernicieuse en la Republique, que ce qui la diuise? ou chose plus saincte & aimable que ce qui l'vnit, & reconcilie? Tout ainsi, Sire, que le temperament ou harmonie de ce corps humain se communique & depart proportionnément és autres parties: voire q̄ si l'Endelechie ou ame mouuante est mal affectee, tout le corps soudain s'en ressent. Ainsi il fault és Repub. bien policees, part & cōmunication estre faicte entre les peuples d'icelles, tant des heureux succès des choses, que des mesauentures ou defastres: autrement chez les Latins mentiroient ces vocables de Cité & Republique,

*Plat. en mes-
me lieu.*

*Arist. au 3.
des Physi-
ques.*

ou tels semblables synonimes.

Sire, j'ozeraï bien dire, en esperance d'estre creu, que le seul fondemēt & soustien de vostre Royaume, c'est l'establissement & obseruance vsagere de vos loix & Edicts, esquels seuls repose iustice, liberté, & l'habitude & vnion de vos bōs subiects naturels: sans la *Cic. en l'orai pour Cluent* cōmune vsance desquels, vos manoirs royaux, vos belles citez, nos maisons & familles, voire & toute ceste Monarchie cōfusement se subuertiroit, & decheroit de fōds en comble. Sire, continuez, & *Cic. au 3. d loix.* tenez main aux loix anciēnes des Rois vos ayeulx, à l'exēple de Pausanias, qui enquis pourquoy en Sparte il n'estoit loisible d'innouer aux loix anciennes, Par-tant (respondit-il) que les hōmes n'ont point d'autorité sur nos loix. *Plutarc. d Apoph.*

H A R A N G V E

Certes, Sire, vous ne deuez moins
mettre l'armet en teste, & faire
marcher le soldat deffoubs vos
enseignes pour repousser l'enne-
my des frontieres, garder, ou de-
fendre vos forteresses, que pour le
soustenement & entretien de vos
loix & Edicts : car, Sire, vos sub-
iects peuent bien viure en paix
& vnion sans mur ou rāpart, mais
sans loix ou statuts, paix & con-
corde ne peult subsister en vostre
Royaume. Je tien dōcques pour
vn theoreme, Sire, que les hom-
mes sont serfs des loix, pour par
elles estre gardez & maintenus en
leurs libertēz: l'enten celle liberté
par laquelle il est loisible à vn cha-
cun de faire ou soy aduire honne-
stement à ce qu'il luy plaist : Les-
quelles loix Porcie Caton appelle
les nerfs des citez, l'ancre & gou-

ic. aux Pa-
d. & i. des
fic.

uernail des choses publiques.

Toutesfois, Sire, l'effrontee audace d'aucuns trop mutins est telle & si acreee, que les loix à leur respect ne semblent estre que toiles d'araignes, ainsi que disoit Anacharsis le Scythe: Soy voulans euxmesmes forger & bastir des loix à leurs plaisirs sensuels, & au desir de leur chair: comme Cesar fait par sa loy Iulie, par laquelle il mulctoit & punissoit du dernier supplice ceux qui solennellement ne vouloyent iurer en ses loix.

*Valer. Max.
liu. 6. chap.
des chof. fa-
dictes & fa-
ctes.*

Sire, aujourd'huy il y a plus de Cleons, de Iugurthes, ou de Catilines és cueurs des Republicques, qu'il n'y eut encor oncques: Et certes sont rares ceux qui condignement defferuiroyent la couronne de chesne ou d'oliue, le seul ioyau & guerdon de paix; Car l'enflee

*Appian. liu.
de la guerr.
civil.
Plutar, en
politiq.*

*Virg. au 8.
des AEnes.*

H A R A N G V E

& alteree ambition tellemēt huy
librement commande sur les hō-
mes, que leurs pēsees, leurs actiōs
& estudes ne tendent & aspirent
qu'à la totale ruine & subuersion
des Monarchies. Tout ainsi, Sire,
ic. en l'orais. q̄ la mer, || qui de sa nature est cal-
sur Cluen. me & bonace, est veüe agitee par
l'orage & horreur des vens: Ainsi
l'estat des Republiques, qui de soy
est tranquille, est troublé & sub-
uerti par la voix pesteuse & ho-
stile des seditieux, perturbateurs
& ennemis du repos public. Sire,
telles libertez & insolences impu-
nies ne prouiennent que du seul
most. en la mespris & cōtemnemēt des loix ||
rais. cont. qui huy sont sans ame, n'ayāt sang
l. ne force pour la iuste crainte que
elles ont de ceux mesmes qui les
deuroyent craindre, cherir & re-
uerer. Tout ainsi, Sire, que le Chi-

rurgien || cauterise ou coupe du *Cic. contr. Vatin.*
 tout le membre mort & pourri,
 pour crainte qu'il ne corrópe ou
 putrifie les autres parties saines &
 bien affectees , ainsi fault-il, pour
 la conseruation & repos des cho-
 ses publiques , exiler ou du tout
 exterminer les rebelles, pour crai-
 te qu'ils n'endommagent les bien-
 nez à la grande iacture & ruine
 de l'estat public . Ce que , Sire,
 & sans controuerse m'accorderót
 ceux qui n'ont rien tant cher que
 la iuste punitiõ des infrañteurs &
 contẽpteurs de vos loix & Edicts.
 A bon droict, Sire, ie tien dõcques
 pour coupables de lese Maiefté || *Cor. Tacit. au 1. des An- nal.*
 ceux qui tant outrecuident & o-
 sent, que de trãsgresser & enfrain-
 dre vos loix sainctes , lesquels cõ-
 me perdus & deplorez , à l'exem- *strab. de la sic. du monde, liur. 14.*
 ple d'un Herostrate || , veulent cõ-

H A R A N G V E

sacrer leurs noms à l'autel d'im-
mortalité,plustost par le demerite
& desseruice d'vne lasche coniu-
raison ou impressïon dommagea-
ble, que par quelques faicts valeu-
reux , vertueuses ou heroiques
proüesses , les seuls & iustes argu-
mens (côme disoit Socrate ||) d'e-
stre nourri au Prytanee , ou pluf-
tost de condignement desseruir
le nom d'Aristide || : qui pour a-
voir bien merité de l'Aristocra-
tie , fut de tous appelé le Iuste.

Sire, ie n'ay rien tant frequent
& familier en mes souhaits, prie-
res & actiõs de graces, que de voir
vn iour glisser & laschemét chop-
per à leurs courtes hôtes ceux qui
obliquement cuident introduire
& acheminer paix és cueurs des
Prouinces de vostre Royaume, si-
muleement ayans leurs desseings

*Cic. au 1. de
Orateur.*

*Diog. Laer.
Livre 2. &
Plutar. en
Aristide.*

clos au cueur, & le contraire prôpt
 és leures. C'est chose incongrue *Pindare aux*
 & absurde, Sire, que de voir tels *Nemees hym.*
 medecins qui veulent guarir les *3.*
 playes d'autruy, quand eux mes-
 mes ils sont pleins d'vlcères. Sire,
 pour la police & instruction d'v-
 ne Republique ie ne voudroy tant
 me desuoyer que de prendre le
 chemin de l'escolle de tels prece-
 pteurs, & craindroy d'un bon po-
 litic deuenir vn mauuais gendar-
 me. Car comme dit ce grand O-
 rateur, Tout desseing & complot *Demost. con-*
 ambitieux, impatient de repos, est *tre Phil.*
 ennemi public de paix & liberté.
 Vous n'ignorez, & ne vous fuit
 point, Sire, que telles simuletez ne
 ayent esté les premieres causes de
 la subuersion de l'Estat public A-
 thenien, qui commença à decli-
 ner & decheoir par le seul mespris *Thucid. liu. 2.*
& Pier. Cri-
nir. de l'hon-
nest. disc. liu.
chap. 4.

H A R A N G V E

& contēnement des loix anciennes : Car tellement les hydropiques auares & ambitieux cōmencerēt à briguer & gagner les suffrages & voix populaires par factions , corruptions & menees obliques, qu'ils s'inuestirent & emparerent des premieres chaises & degrez d'honneur, abolissans toutes loix, sinō celles qui deferoyēt à leurs impunitiez & tyrānies, cōme serues & ministres de leurs passiōs.

Sire, ce ne m'a esté chose oiseuse que d'auoir ainsi librement traité du proufit & singulier bien des loix sainctes, comme estans l'ame || & les nerfs des citez, le fondement & stable colōne des choses publiques : Car tout ainsi qu'il ne feroit seur de vogner || & faire voile par les costes & trauerses des mers, s'il n'y auoit ports ou haures
pour

ic. pour
luen.

ic. I. de l'In-
ent.

pour l'esperoir qu'ô auroit à la moin-
dre tourmête de les gaigner pour
s'y heberger : Ainsi feroit-il dan-
gereux de viure & conuerfer és
villes & prouinces, s'il n'y auoit
des loix, pour par elles estre gar-
dez & maintenus en protection
côte les aggressiôs des mal-vueil-
lans & coupables. Sire, il se voit
assez que les loix sont crees & e-
stablies pour iustement & exem-
plairement punir les delinquans,
& maintenir les bons en leurs li-
bertez : autrement les citez & vil-
les des Royaumes ne seruiroyent
que d'asyle & damnable retraicte
aux deplorez & proscripts, à la to-
tale subuersion des choses publi-
ques. Sire, la loy est de tel poix,
de telle energie & maiesté, qu'elle
ha seule en main le proiect & des-
seing des affaires de tous les Roy-

*Demost. en la
1. orais. contr.
Arist.*

H A R A N G V E

aumes Chrestiens, laquelle iustement & à bõ droict ie puis appeler la mere nourrice de paix: Toutesfois, Sire, ie n'ay choisi icy seulement de parler de celle loy que nature (accompagnee de raison) liberalement nous departiroit, ains de celle q̃ le Seigneur auroit escripte & imprimee au plus secret du cueur des fideles, par laquelle seule se cognoist le peché, n'estant donnee & escripte que pour nos transgressions & commises: la fin & perfection de laquelle c'est Christ. Sire ce ne sera chose impertinente, & hors de propos, si ie di que le seul argumēt & motif de ces guerres ciuiles, ce est le mespris de la loy & iustice, les semences & vrais fruiçts de la crainte de Dieu: Et ne doubte que tels contempteurs ne soyent tou-

Cic. en la Phil.
2. & 1. des
loix.

Hebr. 8.

Aux Rom. ch.
3.

Aux Rom. ch.
5.
Aux Rom. ch.
10.

chez de sa main comme reprou-
uez. Car (comme dit le Prophete) *Esa. chap. 53*
tout ainsi que le flambeau de feu
consomme le chaume, & la flam-
me friolle la paille: ainsi sera la ra-
cine de tels peruers faicte comme
pourriture, & leur germe montera
comme poussiere, d'autant qu'ils
ont reietté la loy du Seigneur des
batailles, & ont blasphémé la pa-
role du saint d'Israël. Sire, lais-
sons manier & dresser telles guer-
res, & impressions belliques aux
Indois de Calicuth, aux Caniba- *Munstere li.*
les, aux insulaires de Madere, de
Canarie, & aux Barbares des plus
esloignées Garamantes, comme
choses indignes du nom du Fan-
çois. Sire, ores est le siecle & l'ra-
nee où la paix doibt florir & ger-
mer entre les Rois si fortunément
heurez, que d'estre nommez du

H A R A N G V E

nom de Chrestien: Entre lesquels
 Sire, condignement vostre Maie-
 sté sied sur le plus hault & eminēt
 throne. C'est ores, Sire, où les ar-
 mes noisiues doibuent deferer à la
isa. chap. 2. paix, ainsi que le promet Esaye||,
 » Le Dieu des armées(dit-il) iugera
 » entre les gents, & reprendra plu-
 » sieurs peuples: ils forgeront leurs
 » espees en coutres, & leurs lances
 » en faulx: Vne gent n'esleuera plus
 » l'espee contre l'autre, & ne s'addō-
 » nerōt plus à la guerre. Sire, c'est
 chose estrange & intolerable de
 ouir plus le murmure & blasphe-
 me d'aucū outrecuidez mutins,
 lesquels si hautainemēt herissent
 leurs sourcils, & refroignent leurs
 fronts eshontez, qu'il semble, tant
 sont enorgueillis, qu'ils ne tiennēt
 que d'eux & de l'espee: s'appuyās
 & glorifians plus en leurs armes

materielles, que ne fait oncques
 Pelee en sa Machere. Sire la hau-
 tesse de tels hommes sera abbaif-
 fee, & leurs yeux esleuez serōt hu-
 miliez: Car Dieu l'Éternel est sur-
 haussé, & paroist sur tous les Ce-
 dres du Liban, sur les chesnes de
 Basan, voire sur toute haulte tour,
 mur, ou forteresse. Sire, i'estime
 tels bouchers acharnez & alterez
 du sang humain, idignes du nom
 de Chrestie: Car qui feroit anat-
 mie de leurs cueurs mal-sains, il
 ne s'y trouueroit rien q̃ sags, meur-
 dres, tueries, & guerres ciuiles.

Ores iugez, Sire, & poisez de vo-
 stre naifue & coustumiere equité,
 quelle symphonie & alliâce il y a
 entre la guerre & Iustice. Ce que,
 Sire, indoutablement se peult re-
 soudre par le cōmun dire & par-
 ler d'Antigone, qui dict (à vn qui

Zenod.
 et Anac
 ode 5.

Esa. cha

Au lieu
 mesme.

Plutarch.
 Apophteg

H A R A N G V E

luy presenta vn liure traittant de
 Iustice) Qu'il estoit mal aduisé de
 disputer des loix & iustice auec-
 que luy, qui n'auoit riens tāt cher
 & plus en deuotion que les guer-
 res. Sire, entretenez vos Irenar-
 ches, vos Preuosts & protecteurs
 de paix & repos public. Sire, te-
 nez la main à leurs sains conseils,
 faites inuiolablement entretenir
 vos loix & Edicts, à fin que la vie
 de vos subiects soit reiglee par a-
 ctes iustes & condignes, vous ac-
 querant par ce seul moyen loz &
 nom immortel en la suyte des
 Commandemens du Seigneur. Sire,
 comme la clemence & dou-
 ceur debonnaire qui vous enuirō-
 ne de foy incline à la paix & re-
 pos de vostre Royaume : Ainsi
 doncques, mettez y la main ou-
 uriere auecque Dieu, qui seul li-

August. epist.

Q.

unique des

enarch. au

od. la l. der.

u droit du

sque au

d. Theod.

cephor. liu.

chap. 35.

istee en son

f. de la trās

de la loy

Moyse.

beralement la nous peult liurer,
& cognoissez, Sire, que ces mon-
strueuses guerres ne procedēt que
du seul peché de vos subiects : car
le Dieu des Exercites, le fort d'Is-
rael ¶ quand il luy plaist desbande
la terreur de sa puissance, pour a-
uecques son appareil mettre les
entendemens des mortels en crain-
te & frayeur. Sire, ne souffrez li-
gues & partialitez en vostre Roy-
aume : Esteignez & accoisez tels
diuorces & haines mortelles, les
seuls argumens des guerres ciui-
les ¶ . Et regardez de vostre œil de
pieté vos pauvres subiects tāt fou-
lez & profligez des guerres pas-
sees. Sire, ne souffrez ainsi aneā-
tir & auiler l'ordre & pristin estat
de vos Republiques, tant biē or-
donnees & establies par les Rois
vos ayeuls, Et faiçtes, Sire, comme

*Aristee en
ce mesme
lieu.*

*Euripid. en
l'Antig.*

H A R A N G V E

Aul. gell. liu. 7 le poisson Daulphin, qui par vne
chap. 8. tormente & oraige, voyant le na-
Plin. li. 9. ch. 8 uire prest à se submerger, soudain
And. Alc. en accourt à l'ancre de la nef, & de
ses Embl. liu. 1 toute force le serre & estreit, pour
 crainte qu'il ne soit arraché par le
 torrent & effort des vagues. Ainsi,
 Sire, au milieu de tant de souffertes
 & troubles, saisissez l'ancre &
 gouuernail de vos Republiques,
 pour par vostre meur conseil &
 dexterité de vostre main, estre
 restituees & restablies en leur pre-
 mier estre, au mal gré des sedi-
 tieux & ennemis du repos com-
 mun. Sire, punissez telles pestes,
 tels poisons, tels mōstres, qui plus
 qu'enragez abboyent contre la
 paix & trāquillité de vostre Roy-
 aume. Ne vous souffrez deceuoir,
 Sire, par leurs leures menfonge-
 res & emmiellez propos: Fuyez à

force de rames & de voiles leurs
attrayantes harangues, non plus
ne moins (comme dit Agapete^{||})
que les manieres de raur dont v-
sent les corbeaux: car les corbeaux
arrachét les yeux du corps, & tels
seducteurs arrachent les yeux de
l'ame: & estouppét l'odeur & sen-
timent de l'esprit, ne souffrās qu'ō
entende & conçoïue la verité des
choses par leurs ruses & menees,
desguifans le mal en bien, & le biē
en mal, comme publics ennemis
de verité. Sirē, le don & octroy
de la paix est en horreur à tels Ca-
tilines, ou plustost Diagores &
Protagores atheïsez, qui tellemēt
ont leurs leures diuerties, & leurs
cueurs empestez & touchez de la
dégrace de Dieu, qu'ils ne rient si-
non quand ils voyent quelques
prises ou picques entre les Princes

*Agapete à
Iustinian.*

*trepsiad.
ux nuees de
ristoph.
Suer. en
uguste.*

& alliez de vostre sang, pour l'al-
teré desir qui les pousse d'esmor-
cher la pistole, & morguer dessus
le courfier, prins par force chez le
marchant ou le laboureur, à payer
aux Grecques calendes. Et toutes
les proüesses & exploicts de guer-
re & dignes du triomphe que font
tels soldats, Sire, c'est d'espeurer
& acraintir les païsās, & leur faire
accroire par menaces qu'ils leurs
doibuent rétes ou tels droicts sen-
suels, & leur en faire passer co-
gnoissances. Bref, Sire, ce sont
des autres Thrasons gens d'armes,
que quād pour la suyte & deuoir
de vostre seruice il fault liurer ba-
taille à l'ennemi, ou dōner assault
à la breche, à l'exemple des aduo-
cats illetrez, ils demandent iour
pour y aduiser: eux couurans hon-
teusemēt du Stratageme de Thra-

son | ce vaillant guerrier, qui di-
 soit, Qu'il escheoit aux sages d'es-
 sayer & experimenter l'entree des
 appareils hostils plustost par con-
 seils que par armes. Sire, ce seroit
 errer de tout le ciel, que de iuger
 des braueries de tels champions
 par leurs troignes & fiertez hau-
 taines, non plus ne moins que qui
 estimeroit le lyon par ses ongles.
 Non nō, Sire, il fault reprimer tels
 mutins, plus que forcenez & en-
 uieillis en leurs insolences, telle-
 ment que l'exemple en demeure
 à toutes persōnes : & à fin que par
 tel exemplaire vos bien-nez & fi-
 deles subiects naturels soyent à
 bon droict occasionnez de conti-
 nuer de biē en mieux, les erres de
 vos bōs seruices, voire iusques à la
 derniere periode de leurs propres
 vies, sans y espargner perils ou dā-

Terence en
 l'Eunuche

Lucian des
 Heres. & Phi-
 lostrat. en la
 vie d'Apollo-
 nie.

H A R A N G V E

gers quelsconques, ainsi que vostre grandeur & Maïesté condignement le desseruiroit. Sire, le Prince droicturier, & tel que vous estes, faisant iustice de tels deplorez, est trop plus resplêdissant que le Soleil: Car le Soleil fait & quitte place à la nuit suyuate faultrice & receleuse des peruers: mais le Prince comblé d'integrité & rondeur paroist tousiours en sa naïfue & parfaicte lueur, n'endurant l'impureté & meschance des coupables par la lumiere de verité, mettant en euidence leurs iniquitez cachees, pour iustice exemplaire en estre faicte à la rigueur & desir de la loy escripte. Sire, recueillôs à pleines mains les fruiçts sauoureux de ceste saincte paix, laquelle cest Orateur, & à bon droict, appelle yne tranquille liberté. ¶

Agapet à Iustinian.

*Cicero en la 2
Philipp.*

Et vous, MADAME, mettez y
la main ouuriere, cōme celle qui
auez en main, apres la nous auoir
liuree & departie, de la no^r main-
tenir & cōseruer contre les efforts
hostils & subtils aguets des en-
nemis de la tranquillité & repos
public. Madame, il n'y a rien si
populaire que la paix, de laquelle
proufitablemēt se ressentent non
seulement ceux qui seroyent four-
nis & pourueus de raison, ainçois
les bruts, & mesmes les mers, les ci-
tez, les champs & terres arables¶. *Cice. pour la
loy Agr. con-
tre le peuple.*
Certes, Madame, le nom de la
paix est doux, & est de soy chose
salutaire¶. Doncques pour tāt que *Cic. en la Phi-
lipp. 2.*
tenez chere nostre France, conti-
nuez d'un trauail iournallier à la
replanter, & en terre si ferme &
stable, que la voix hostile & ven-
tueux oraige des seditieux ne la

H A R A N G V E

puissent surplanter, voire seulement esbranler à la totale ruine & subuersion de nos citez & belles prouinces. Madame, i'ay osé vous faire ceste digression, comme à celle qui après le Roy seule auez en main la hache & le Caducee: Car il ne me fuit point combien heureusement vous sçauiez bastir & deliberer vne guerre, où l'vrgence & necessité le requiert: & aussi cōposer & faire vne paix, où elle nous est saine & salutaire. Non non, Madame, c'est peu des actions & exploicts de guerre des mortels, s'ils ne sont regis & gouvernez par conseil: car la raison & conseil est trop plus fort que la main. Certes, Madame, ie craindroy trop plus vn sage & bien aduisé, que ie ne feroiy vn ignare, tât fut-il fort, robuste, & vaillât guer-

*Sophocl. en
 Aiace.*

tier. Ainsi doncque iugez, Ma- *Euripid. en*
dame, par vostre coustumiere e- *Beller.*
quité, combien nous viennent à
gaing & proufit vos saincts con-
seils & aduis : car les prudens &
bien aduisez font par leurs bons
conseils que les citez des Royau-
mes soyent tranquilles, & les peu-
ples d'icelles reünis : Attendu que
le conseil meurement pris & reso-
lu, vainc beaucoup de mains : au
contraire temerité inconseillée a-
uecques multitude est aneantie. *Euripid. en*
Car, Madame, le saige gouver- *l'Antiop.*
neur instruit son peuple, & la prin-
cipauté du prudent est bien or-
donnée. Ce qui considereement *Ecclesiast. ch.*
fait à aduiser à vostre respect, ^{10.}
comme celle qui par vostre rare
candeur & coustumiere bien-
vueillance avez gagné le cueur
des plus grands Rois & Prin-

H A R A N G V E

ces de la terre : pour d'un nœud Gordian les rallier avecque le Roy vostre fils , au grand repos & vnion de ses bons subiects.

E T vous, hōmes François, tant aimez & chers de vostre bō Roy, iusques à quād abuserez-vous de sa patience, de sa douceur & clemēce rare? Ne voulez-vous point despouiller ces harnois froissez? ces corselets? ces saigneuses armes ensanglātees de vostre sang mesme? Dont viennent telles licences d'armes, telles impressions belliques, & appareils hostils? dont viennent telles rancueurs, tels orgueils acretez, & telles haines plus que capitales? Ne craignez-vous point l'ire du Dieu des armées? du Dieu(dy-ie) qui fait tomber à hon-
te & ruine les braueries des per-
uers,

uers, & qui arrache mesme les racines des nations orgueilleuses, & plante avecque gloire les petits en leurs places||? Certes, Hommes François, le sang innocent & triste crie vers luy, & les ames des iustes le reclamēt||: Parquoy sa dextre ne pardonnera point au meschant, & son glaiue ne se departira point de ceux qui respandent le sang innocēt sur la terre||. O gēte entre les fers, l'acier & les armes||, gent contraire & aduersaire de paix, gent ennemie des Rois, des Rois(dy-ie) qui luy sont destinez & beneits du Ciel. Certes les Rois nous font proposez de Dieu|| pour volontairement estre seruis & obeis de leurs subiects, leur estant sainctement ministré du Ciel moyens & conseils|| pour maintenir leurs peuples en equité

*Ecclesiast.
chap. 10.*

Esdr. li. 4.

*Esdr. au
mesme
lieu.*

*Tir. Liue. de
la uill. bastie
liur. 10.*

*1. Rois
chap. 8.
Deut. 17.*

Prouer. 21.

H A R A N G V E

Hesiod. en sa
Theog. & iso
crat. en Ni-
coch.

& droicteure. Car (comme dit He-
siode) les Rois sont issus du Ciel,
pour paroistre & resplendir sur les
hommes, & maintenir en leur en-
tier les preferences & liberté des
iustes, pour honteusement renuer
ser, ou du tout exterminer les coul-
pables. Ce qu'en ma Soltane tra-
giquement i'ay chanté avecque
l'Homere,

Homer. en
l'Il. 6.

-- Non non, Sophe, les Princes
Ne sont nex avec nous en ces basses Prouinces,
Ains là hault saintement du Ciel estans issus,
Et du sang de Iuppin diuinement conceus.*

L'Auteur
en sa Solt. Tra-
gedie act. 4.

Mais encores, hômes François,
ne doutez-vous point l'ire de la
Maiesté de nostre Roy? Ne lisez
vous pas au saint texte, Que la
terreur d'un Roy est comme le ru-
gissement d'un lionceau, & ceux
qui le font courroucer pechent cō-
tre leurs ames. Non non, hom-
mes François, c'est par expres o-

Proter. 20.

Etroy & vouloir de Dieu que les
 Rois regnent, & ceux qui font les
 loix ordonnent choses iustes. Et *Prouerb. 8.*
 à bon droit certes : Car les princi-
 palez de la terre sont en la main
 du Seigneur, & ceux qui les re- *Eccles. cha 10*
 gissent, par luy establis. Gardons
 nous bien, Hommes François,
 que ne soyons fenestrement tou-
 chez de l'iniure & marque tant
 reprochee aux Romains, qui e-
 stoit d'auoir le nom de Roy en
 haine & horreur. Vrayement, le *Plutar. en*
 don de regner est vn saint mi- *Luculle.*
 nistère de Dieu : & sont les Rois *Plutar. en*
 de la terre par luy preeleus pour *Num. Pöpile.*
 estre chers & reuerz par leurs
 subiects, cōme chers mignons & *Aux Rois,*
 Anges de Dieu, ou dieux secon-
 daires. Certes, Hommes François,
 si vous poisez bien à l'equilibre
 d'equité la charge & accablāt faiz

que soustiennent les Rois & Prin-
ces terriens, les soings & cures qui
les poignēt pour nous maintenir
en paix & liberté : à bon droict
vous iugeriez q̄ c'est d'estre Roy.

*Plutar. és A-
pophteg.*

Comme nous lisons d'Antigone
qui à vne bonne vieille qui le lou-
angeoit pour la grandeur & felici-
té du nom d'Empereur, luy dict
ainsi, Bonne femme, si tu sçauois
de quantes peines & aigreurs est
plein ce diademe, s'il gisoit en vn
boubier, à peine le voudrois-tu
recueillir. Il ne vous fuit point,
Hommes François, le festin &
conuoy que feit Denis Syracu-
san à Damocle, pour luy môstrer
les trauaux & peines insouffrables
qu'endureroient les Rois terriés.

*Val. Max. liu.
6. chap. des
ch. sag. dictes
& faictes.*

Vous n'ignorez aussi ce que disoit
ce bon Roy, qui forcé de prendre
la tyare, premier que l'apposer sur

son chef, la regarda d'ũ œil de pieté, en disant ces mots, ô Diademe plus noble qu'heureux ! Que diray-ie d'Abdolomine, qui simple *Quint. Cur. lurre 4.* citoyen s'adduisant à cultiuer vn petit iardin fut créé Roy des Siconiens, & approuué tel par Alexandre. Ce qu'il refusa instamment, tellement qu'il fut contraint par la voix & suffrage de tous de l'accepter. Certes, Hommes François, ie ne vous puis assez loüãger les vertus & raretez desquelles seroit rempli nostre Roy, comme le parangon & archetype de toutes excellences, n'approchant riens à ses vertus & prouesses la louange de Probe, Empereur, ou d'Vlpie *Flauie Vopis.* Traian, tant recommandé pour *Sext. Aurelie Victor, en vlp. Traian.* la diligence dont il vsoit és choses militaires, & de la douceur enuers ses subiects, vsant de sainteté en

H A R A N G V E

sa maisō,és armes de force, & par
 tout de prudence. Indoutable-
 ment, si le Roy Loys, fils de Char
 E^{gna. li. 3.} & lemaigne par le cōble de ses ver-
 Gu^{aguin li. 4} tus rares iadis auroit esté surnom-
 me le debonnaire, sans contredit
 & à bon droict nous pouuōs bien
 appeler cestuy nostre Roy le be-
 neict de Dieu : Car ie ne leus onc-
 ques que sous le regne d'aucuns
 Rois ayēt esté assoupis & enseue-
 lis au cercueil d'oubliance plus de
 troubles, diuisions, & guerres in-
 testines, que sous cestuy Roy
 Charles. Vous scauez, Hommes
 François, de quelle face auguste &
 modestie incroyable, il a supporté
 vos ieunesses, ou plustost vos in-
 sults hostils & insolēces tragiques.
 Ouy, vous le sçauz : à tant vous
 en doibt suffire. Vrayemēt ie croy,
 & ce n'est foy vaine, qu'il ne fut

oncques veu Roy si humain, & de si aisé & facile accez. Vous le sçavez, Hómes François, & de quelle patience & candeur de iour à autre il oit vos requestes, voire le plus souuēt importunes. Peu certes a vallu aux autheurs Romains de tenir en telle preference, & si hault degré leur Octauian Auguste, & Tybere Cæsar || pour les recommander à leurs puis-nez de leurs facilitez accessibles: Et à bon droict mon dire rencontroit trop plus de faueur és cueurs des lisans sans comparaison, en racomptât l'histoire d'un ieune Roy tant Auguste, que non à discourir vne Romaide: Qui seroit proprement compter chose plus antique que la Diphthere. O Dieu immortel ! mais qui est le Stoicien si apathique, qui n'eust perdu ou esgaré

C.iiii.

*Suet. en Oct.
Cesar.*

Dion. Caß.

*uet. en Tite
Vespas.*

ses meilleurs esprits, se voyant couronné entre tant de fers , tant de feux & armes noisiues ? Las ! vous sçauuez, Hommes François, à l'exemple d'Anthoine Pie empereur, de quelle grace & pieté il a usé enuers les aucuns, & useroit encores enuers ceux qui voudroyent prendre les armes cõtre ses Edicts: sans qu'il vueille qu'ils soyent recherchez, sachant bien qu'il est Lieutenant de Dieu, iuste executeur de sa volonté, & conseruateur de ses tressainctes loix : & ainsi remettant entre ses mains la iuste vengeance de telles osees entreprises. Comme nous lisons de Tite Vespasian qui ne permit punir & mulcter ceux qui contre luy auoyent brigué l'Empire Romain, disant que les Empires estoient destineement deferez du Ciel.

O candeur & debonnaireté incroyable ! ô Roy fortuneement heuré , Roy cheri & beneiçt de Dieu ! Vrayement, Hómes François, si Trasibule a acquis loz & nom immortel pour auoir introduiçt chez les Atheniens la loy d'Amnistie : que desseruira donc cestuy nostre Roy, qui a interdiçt toutes partialitez par son Edict de paix : voulant toutes querelles priuees demeurer enseuelies sous oubliance ? Marc Antonine Empereur a esté louangé d'auoir ploré la mort & occision d'Auidie Cassie son capital aduersaire : disant qu'il luy desplaisoit dont lon l'auoit occis, & qu'il vouldroit qu'il fust plein de vie pour exercer enuers luy tous droiçts & fonctions de pieté. Mais que dirons-nous de cestuy nostre Roy, qui pēdant

*Anth. Sabell.
liu.8.*

*Vulc. Gallic
& Pierre Cr
nit li.22.ch.7*

ces guerres ciuiles n'a permis d'une part & d'autre aucune tuerie ou occision, ayant reintegré les proscripts en leurs biens & familles? A bon droit, Hommes François, nous deuons recognoistre, louer & admirer les incomparables vertus dont prodigalement il est embelli & doué. Autrement mentiroient ces caracteres & figures diuines qu'il auroit imprimées au front, indice de l'esprit: & notament ces deux lignes droictes & simples sises au lieu de Mercure, qui ne denoteroient autre chose que la magnanimité, droiture & rondeur dont heureusement il seroit remply. Ceux qui ne le cognoissent par art & science, le peuuent ainsi iuger par ses œuvres.

Or donc, Hommes François,

*hadd. Hag.
n sa Metro-
scop.*

reuerons en toute humbleſſe ce
 petit Roy tant heureuſement be-
 neict du Ciel:lequel côme le Roy
 d'une armee d'abeilles ¶ eſt ſans a- plin. de l'hiſt
 guillon, armé de ſa ſeule grãdeur nat.liu.II.
 & maieſté: Vſons enuers luy de la
 Protomedie¶,à l'exemple des Ma- plin.liur. 24
 ges, pour meritoirement nous ac-
 querir ſes grace & faueur, ſans luy
 manquer d'un ongle trauers des
 deuoirs & fonctions muneraires
 en quoy luy ſerions eſtroictemēt
 obligez. Receuons-le en ſes ci-
 tez & belles Prouinces: eſpandōs
 luy des oliuiers en ſigne de paix.
 Non non,il abhorre l'effuſion du
 ſang des François, il veult que les
 releguez retournent, & q̃ les pro-
 ſcripts reçoïuēt leurs biens: Voire
 qu'il diroit volontiers avec Marc vulc. gallic
 Antonine Empereur,¶ *Vtinã poſſem* Pierre Crin
multos etiam ab inferis excitare! de l'honeſt
 Ainſi diſc.liu. 22
chap.7.

H A R A N G V E

doncques, Hommes Francois, receuons-le avecque Harangues & feux de ioye és palais & manoirs Royaux de ses Prouinces : Et qu'il soit crié par les rues & tous endroiçts & contrees de la France, ce qui se disoit par le menu peuple à l'eslectiõ de Maxime & Balbine Augustes, Il est equitable, il est iuste, Charles Roy inuincible, Dieu vous benisse : Dieu vous a faict Roy, Dieu vous conserue.

al. Capitol.

Sus sus, Hommes François, laissons ces partialitez & rancueurs : Laissons ces feux, ces brandons, ces armes saigneuses : Et soyons saiges de nos perils mesmes, preuoyans les pertes, tueries, & impressions belliques que nous ont charroyé ces guerres passees, où nous auõs veu par tel defastre postereement les peres inhumer

leurs enfans || ia grands & adults, Herodot. en Clion, liu. 3.
 perdre & ruiner par incendie tât
 de belles villes. Vrayement, Hô-
 mes François, il n'y a rien qui soit
 tant digne du nom & liberté du
 bon citoyen ||, que de detester & Cic. à Attic. liur. 9.
 fuir telles guerres ciuiles, mesme-
 ment ceux qui se veulent nômer
 & daigner du nom de Chrestien,
 côme ne leur estant rien tant cher
 & plus recommandé que la paix:
 laquelle Dieu || par droict heredi- Marc 13.
 taire nous a delaissee pour viure
 ensemble en vnité de foy & Re-
 ligion.

I'AY DICT.

A ROBERT ESTIENNE
IMPRIMEVR DV ROY,
Sonet par l'autheur.

Pour consacrer son lox à l'Immortalité,
L'un s'adduit au tournois, les autres à richesse,
Aux Martiaux arrois, les autres à hauteffe,
Et ceux là aux grandeurs & toute braueté:
Celuy là plus accort, bragard & acreté,
Quelque Prince ou Seigneur serulement caresse:
Mais Estiène, dy moy, mais de tous ces biës qu'estce,
Sinon tous biens caducs sans nulle fermeté?
O combien seroit mieux heureusement t'ensuyure,
Quand ainsi par ton art tu fais le mort reuiure,
Par ton docte labeur quand tu sacré à l'Autel
Et au temple diuin de la sainte Memoire
Le renom des bien-nex, dignes de lox & gloire,
Auec eux sainctement te rendant immortel!

